

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होंरें आखेया ऐ जे भारत दी "सुधार एक्सप्रेस" गइडी उपरोतली रफ्तार फगइदी जा करदी ऐ ते एह मजूदा सरकार दे सुधारात्मक जतनें कारण मुमकिन होआ ऐ।
2. केन्द्र नै भारत दी जनगणना 2027 दे पैहले गेइ दी अधिसूचना जारी करी दिती ऐ।
3. तमिलनाडू च पट्टाली मक्कल काची पी.एम.के. राज्य दे एन.डी.ए गठबंधन च शामिल होई गई ऐ।
4. विदेशमंत्री डाक्टर एस. जयशंकर होंरें आखेया ऐ जे पूरी दुनिया अज्ज राजनीतिक यक्को-तक्की दा सामना करै करदी ऐ- जेहदे चा बाहर औने लेई दुनिया दे मुल्खें गी किट्ठै रलियै जतन करने होगंन।
5. अमरीका दे विदेशी एजेंट पंजीकरण अधिनियम आसेया जारी दस्तावेजें थमां पता लग्गा ऐ जे आप्रेशन सिंदूर दोरान पाकिस्तान बड़ा मता डरी गेदा हा ते उन्नै लड़ाई मकाने लेई 50 कोला मती बारी विदेशी एजेंसियें कन्नै सम्पर्क कीता हा।
6. आई.सी.सी. महिला टी-20 विश्वकप 2026 क्वालिफायर मुकाबले दा कार्यक्रम जारी करी दिता गया ऐ।

PM- Reform Express

प्रधानमंत्री नरेन्द्र मोदी हों आखेया ऐ जे भारत दी “सुधार एक्सप्रेस” उपरोतली रफ्तार फगड़दी जा करदी ऐ- कीजे चालू माली बरे दौरान मुल्खे दा सकल घरेलू उत्पाद यानि जी.डी.पी. 7 इशारिया 4 प्रतिशत रौहने दा अनुमान ऐ- जेहड़ी पिच्छले बरे 6 इशारिया 5 प्रतिशत ही। कल जारी जी.डी.पी. दे आकड़े पर अपनी प्रतिक्रिया दिंदे होई प्रधानमंत्री हों आखेया जे एह बाददा एन.डी.ए सरकार दे उपरोतली जारी जतनें कारण मुमकिन होआ ऐ- जिंदे तैहत भारत च रासपूंजी लाने गी बढ़ावा दिता गया। मंग आधारित नीतिगत उपास बी शामिल न। जियां जे पैहले बी खबर दिती जाई चुकी दी ऐ कि असल सकल घरेलू उत्पाद यानि जी.डी.पी च माली बरे 2025-26 च 7 इशारिया 4 फीसद दे बाददे दा अंदाजा ऐ। चालू माली बरे लेई जी.डी.पी दे पैहले अगेत्रे अंदाजें मताबक, असल जीडीपी दा स्तर 201 लकख करोड़ रुपें शा मते रौहने दा अनुमान ऐ, जिसले के 2024-25 लेई एहदा अनुमान 187 लकख करोड़ रुपें शा मता हा। सांख्यिकी ते कार्यक्रमें दी अमल-आवरी सरबंधी मंत्रालय ने आखेआ ऐ जे बपार, होटल, ट्रांसपोर्ट, संचार ते प्रसारण दे खेतरें कन्नै सरबंधत सेवाएं च इस माली बरे दे दरान 7 इशारिया 5 फीसद दे बाददे दा अनुमान ऐ।

<><><><><><>

Census 2027

केन्द्र नै भारत दी जनगणना 2027 दे पैहले गेड़ दी अधिसूचना जारी करी दिती ऐ। इस बरे पैहली अप्रैल कोला लेइयें 30 सितम्बर तोड़ी सब्भनें राज्यें ते केन्द्र

शासत प्रदेशें च घर-घर जाइयै मरदमशमारी दा कम्म कीता जाहग। हर इक राज्य ते केन्द्र शासत प्रदेशें आसेया तैहत 30एं दिनें दी अवधि दे दौरान जनगणना दा कम्म तोड़ चाढ़ेया जाहग। गृह मंत्रालय आसेया जारी अधिसूचना च आखेया गया ऐ जे अधिसूचना कार्यक्रम मताबक घर-घर जाइयै जनगणना शुरु होने कोला लेइयै 15एं दिनें दे अंदर-अंदर आपू अपनी गिनत्री करने यानि स्वगणना दी सुविधा उपलब्ध होग।

<><><><><><>

PMK- NDA

तमिलनाडू च पट्टाली मक्कल काची पी.एम.के. राज्य दे राश्ट्री जनतांत्रिक गठबंधन यानि एन.डी.ए च शामिल होई गई ऐ। AIADMK दे महासचिव पलानी स्वामी होरें चेन्नई च PMK प्रमुख अबुमणि रामदास हुंदे कन्नै मीडिया सामने गल्लबात करदे होई PMK दे NDA च शामिल होने दी घोषणा कीती। AIADMK दे महासचिव होरें आखेया ऐ जे ओ पैहले थमां गै BJP दे कन्नै गठबंधन च हैन ते उनें अपने गुट ते पार्टियें गी शामिल करने दी संभावना जताई ऐ। एहदे इलावा PMK अध्यक्ष अबुमणि रामदास होरें दावा कीता ऐ जे तमिनाडू दे लोक सत्ताधारी पार्टी DMK कन्नै नाराज न इस करियै AIADMK दी अगुआई आहला गठबंधन भारी बहुमत कन्नै सरकार बनाग।

<><><><><><>

ISRO-PSLV C62

भारती अंतरिक्ष अनुसंधान संगठन इसरो इस म्हीने दी 12 तरीक गी PSLV-C-62 मिशन दा प्रक्षेपण करने जा'रदा ऐ। इसरो नै अपनी इक सोशल मीडिया पोस्ट पर घोशणा कीती ऐ कि उपग्रह गी आंध्र प्रदेश दे श्री हरिकोटा स्थित सतीश धवन अंतरिक्ष केंद्र थमां संगारे 12 जनवरी गी बडलै 10 बज्जियै 17एं मिनटें पर गासै च छुड़ेआ जाहग। एहदे तैहत भारत सने होरनें किश देशें दे 18 उपग्रह बी प्रक्षेपित कीते जाडन। इस मिशन दा मुख्य पेलोड पृथ्वी अवलोकन उपग्रह EoS-N-1 ऐ।

<><><><><><>

JK -Billawar Encounter

कठुआ जिले दे दूर-दरेडे गां घौग च सुरक्षाबलें ते आतंकवादियें बश्कार टाकरा भखी पेया ऐ। टाकरा कल संजा उसलै शुरु होआ- जिसलै सुरक्षाबलें गी इलाकें च 2 थवां 3 आतंकवादियें दी मौजूदगी बारे सूह थहोई। एस.ओ.जी. कठुआ नै कमांड Nallah कश आतंकवादियें गी घेरे दा हा। आई.जी.पी. जम्मू भीम सेन Tuti होरें सोशल मीडिया दी इक पोस्ट च- इस बारे जानकारी दिती। आई.जी.पी. होरें आखेया जे नेहरें- घने जंगलें दे ते मुश्कल इलाके दे बावजूद एस.ओ.जी आस्सेया आतंकवादियें गी फगड़ने लेई जल्न कीते जा रदे न। सी.आर.पी.एफ. दी टीम बी इस सांझे अभियान च शामिल ऐ।

<><><><><><>

EAM-Global Order

विदेश मंत्री डाक्टर एस. जयशंकर होरें आखेया ऐ जे पूरी दुनिया अज्ज राजनीतिक यक्को-तक्की ते भू-राजनीति संघर्ष आहले माहौल दा सामना करै करदी ऐ ते असेंगी एहदे च स्थिरता आहन्ने लेई कम्म करना लोइचदा। फ्रांस दे विदेशमंत्री जीन नोएल बैरोट हुंदे कन्नै कल पैरिस च लग्गी दी बैठका च जयशंकर होरें आखेया जे फ्रांस- भारत दे सब्भनें शा पराने राजनीतिक सांझेदारी चा इक ऐ। उनें आखेया जे मजूदा समें च वैश्विक राजनीति दी स्थिरता प्रदान करने दी बड़ी मती लोइ ऐ ते एदे लेई सब्भनें गी किट्ठे रलियै कम्म करना लोइचदा। विदेशमंत्री होरें इब्बी दस्सेया जे इस बरे भारत बिकस दी अध्यक्षता करा करदा ऐ- जिसलै जे फ्रांस जी-7 दी ते दवै मुख्य जी-20 समूह दा बी हिस्सा न- इस करियै इनें दौने दी इस माहौल च जिम्मेदारी होर बी बधी जंदी ऐ।

<><><><><><>

OP Sindoor -Pakistan

पैहलगाम आतंकी हमले दे बाद भारत दे आप्रेशन सिंदूर नै पाकिस्तान गी पूरी चाल्ली ल्हाइयै रखी दिता ऐ। इस सच्चाई दा खलासा अमरीका दे विदेशी एजेंट पंजीकरण अधिनियम दे तैहत जारी दस्तावेजें थमां होआ ऐ। एहदे मताबक पाकिस्तान नै अमरीका दी मदद लेई तरले मिन्नता कीता जे भारत पर दबाव बनाइयै कारवाई रुकाई जा ते एहदे बदले च होर मते निवेश- विशेष पुज्ज ते महत्वपूर्ण खनज देने दी गल्ल बी आखी ही। आप्रेशन सिंदूर दे दौरान

पाकिस्तानी राजनयिकें ते रक्षा अधिकारियें केंई अमरीकी अफसरें-बचोलियें ते अमरीकी मीडिया दे राएं ई-मेल फोन कॉल ते व्यक्तिगत मलाटियें राएं भारतीय कारवाई रुकाने लेई 50 कोला मती बारी सम्पर्क कीता हा। आप्रेशन सिंदूर जम्मू-कश्मीर दे पैहलगाम च सैलानयें पर होए दे आतंकी हमले दे परते च भारत दी तरफा कीती गेदी कारवाई ही। 6 ते 7 मई दी मझाटली रातीं भारत नै पाकिस्तान ते पाकिस्तान दे नजैज कब्जे आहले जम्मू-कश्मीर दे बक्ख-बक्ख हिस्सें च जैश-ए-मोहम्मद- ते लश्करे तैयबा जनेह आतंकी संगठनें कन्ने जुड़े दे सिखलाई कैम्पें- लाचिंग पैडें- आतंकवादियें दे कमांड सेंटरें ते केंई आतंकी ठिकाने गी तबाह करी दिता हा- जेहड़े भावलपुर- मुद्रीके- मुजफराबाद ते कोटली स्थित हे।

<><><><><><>

US- Venezuela Trade

अमरीकी राष्ट्रपति डोनाल्ड ट्रम्प होरें आखेया ऐ जे वेनेजुएला नमें तेल समझौते थमां हासिल पैसे दा इस्तेमाल छड़ा अमरीकी चीजें-बस्तें दी खरीद च इस्तेमाल करोग। इक सोशल मीडिया पोस्ट च ट्रम्प होरें आखेया जे इस खरीद च- अमरीका च बने दे कृषि उत्पाद- दोआइयां- मैडिकल उपकरण ते होरनें चीजें दे इलावा बिजली-ग्रिड ते ऊर्जा -सहूलतें गी बेहतर करने आले संयत्र शामिल होगन। एहदे शा पैहले ट्रम्प नै इब्बी आखेया हा जे वेनेजुएला दा अंतरिम प्रशासन मंजूर कीता गेदा 30 थमां 50 मिलियन 2 Barrel तेल अमरीका गी देग ते इसी बजारे दे भारे मुजब बेचेया जाग ते इस पैसे पर पूरा नियंत्रण ट्रम्प हुंदा होग- तां जे

इस गल्लै गी पक्का कीता जाई सकै जे एहदा लाभ वेनेजुएला ते अमरीका दे लोकेँ दे फायदेँ लेई कीता जाई सकै।

<><><><><><>

Women T-20WC

आई.सी.सी. महिला टी-20 विश्व कप क्वालिफायर -2026 दे कार्जक्रम दी घोषणा करी दिती गई ऐ। एह टूर्नामेंट 18 जनवरी कोला लेइयै पैहली फरवरी तगर नेपाल च आयोजित कीती जा रदी ऐ। इस टूर्नामेंट च शामिल होने आहलियां 10 टीमां खीरी चार थाहरें लेई मकाबला करगंन। टूर्नामेंट दे मैच काठमांडू च त्रिभुवन युनिवर्सिटी इंटरनैशनल क्रिकेट ग्राउंड च अपर मुलपानी क्रिकेट ग्राउंड च खेइडे जागंन। एहदे शा पैहले 14 जनवरी थमां मुख मैचें लेई एंट पखाने गितै 10 वार्म अप मैच बी रखे गेदे न- जिंदे बाद 18 जनवरी कोला टूर्नामेंट दी औपचारिक शुरुआत होग। क्वालिफायर मकाबलें लेई दंऊ ग्रुप बनाए गेदे न- जिंदे च ग्रुप-“ए” च बांगलादेश- आयरलैंड- नामीबिया- पापुआ- न्यू गिनी ते अमरीका न- जिसलै जे ग्रुप “बी” च मेजबान नेपाल दे इलावा नीदरलैंड- स्कॉटलैंड- थाईलैंड ते जिम्बाब्वे शामिल न।

<><><><><><>